

Öise Lade 3-2009, p. 54

Tge bellezza! – Suentar la lunga pausa d'enviern èn ins ussa puspè plain schlantsch per la nova stagiun en curtin. Ensemen cun las emprimas flurs sa dasdan en mai era las ideas, tge che jau pudess far da nov u midar quest onn en mes



## Partenza en la nova stagiun

### d'orticultura

curtin. Mintg'onni hai jau puspè novas ideas. Il curtin n'è mai a fin. El n'è mai definitiv. Jau entschaiv puspè a sfegliar enavant ed enavos revistas e cudeschs d'orticultura per rimnar ideas ed alura bumbardesch jau mes um cun ils resultats. Natiralmain èn quellas ideas adina era colliadas cun lavur, uschia che ses entusiassem è in pau limità. Sper l'experimentar ed empruvar ora novas chaussas, gaud jau surtut era da pudair far insatge cun l'entira famiglia ora en il liber. Il bel dad ierts e curtins èn ch'els dattan spazis d'agir e la pussaivladad da realisar atgnas ideas. Uffants n'han betg il medem gust ed ils medems giavischs sco nus creschids e natiralmain n'avain era nus creschids betg tuts las medemas preferenzas. Per fortuna! Uschia vesan ora ils dus pitschens curtins da nossas figlias tut auter che l'era da fluras da mes um, noss iert dad ervas u «mias» parts en curtin ed era l'era avant chasa, ils cunfins da nossa parcella u ils elements verds sin nossa terrasza sa differenzieschan danovamain. Mintga part è atgna ed ha ses agen scharm. Ina metta ses accents la primavaira, l'autra la stad e la terza envida a sa cumblidar e siemiari l'atun.

Jau giavisch era a Vus bels muments en Voss curtin.

Cordialmain

A handwritten signature in blue ink that reads 'K. Kohler-Pattis'.

Karin Kohler-Pattis